

# Ina purschida pulpida

Surselva Turissem ha rimnau e publicau ils arranschaments da stad

DAD ANDREAS CADONAU / ANR

■ **La schelta ei vasta. Igl accumpignader da vacanzas da Surselva Turissem dat perdetg dad ina reha purschida culturala e sportiva egl intschess dalla Stussavgia entochen Trun. A favur dad indigens e hosps.** Tuttas e tuts che selamentan dalla passivitat sursilvana arisguard la purschida culturala, sportiva e culinaria duein sfegliar cun temps e

peda igl accumpignader dallas vacanzas da stad derasaus dacuort da Surselva Turissem. La varietad dad occurrenz ed eveniments fa surstar ton sco il diember spatishau naven dalla Stussavgia, Foppa, Lumnezia e siado entochen Trun. Igl intschess tgirau turisticamein da Surselva Turissem. Ei vegn ad esser grev da tscherchar persunas ch'anflan buc in soli arranschament che pudess cuntentar ils agens basegns. Sur-

selva Turissem sesprova buca sulet da porscher als hosps las informaziuns necessarias. Aschibein vul l'organisaziun turistica intimar la populaziun indigena da far diever dalla purschida da stad. Vinavon vulan ils turistichers far attent alla incumbensa dall'atgna organisaziun. Cavigliar occurrenz ed arranschaments e derasar la nuviala.

> PAGINA



Musica sin la fontauna da Valendau, ina dallas numerusas occurrenz da stad en Surselva.

# Ina reha purschida culturala e sportiva

Surselva Turissem ha derasau in vast accumpignader da vacanzas

DAD ANDREAS CADONAU / ANR

■ **Serender el lontan, en Surselva marscha pauc ni nuot. Ina expressiun definitivamein sper tutta realitad. La cumprova deriva digl accumpignader da vacanzas da Surselva Turissem.**

Dalla Stussavgia entochen Trun, bunamein mintgigi ha liug ina occurrenza ni l'otra el decuors dalla stad. Naven dil sport, la cultura e diversas isonzas succeda eveniment sin eveniment. Cavigliu tutt'occurrenzas ha Surselva Turissem en sia brochura titulada sco «accumpignament da vacanzas». Ils divers concerts ein sulet ina part dalla purschida. Cant tradiziunal a prau cun concerts da musicas instrumentals, musica populara, classica, notg da blues, ed aunc bia auter sper ils events gronds dad Opera Viva ni Open Air Lumnezia. In'egliada ella brochura da Surselva Turissem fa surstar, indichescha ella gie sulet la purschida en ina part dalla Surselva. Il commember dalla gestiun da Surselva Turissem, *Stephan Meyer*, ha tradiu che la brochura hagi contonschiu tutt'casadas egl intschess da Surselva Turissem. En quella fuorma sepresenti la brochura per l'emprema ga ed ella sedrezzi buca sulet als hosps da vacanzas. Surselva Turissem vegli era mussar alla populaziun indigena tgei che marschi tut en Surselva. Secapescha che quella populaziun seigi envidada da separticipar als arranschaments, sco ils hosps seigien envidai da separticipar alla purschida culturala indigena. *Stephan Meyer* ha tradiu che Surselva Turissem seprovi era d'intermediar alla populaziun indigena sia atgna incumbensa. Numna-



**Ha liug per l'emprema ga: La Transruinalta, in maraton naven da Glion entochen Tusaun tras la Ruinalta.**

MAD

damein da rimnar l'entira purschida ed intermediar ella anoviars sco anenviars. Vi-

navon ha il menader dil post d'informaziun da Surselva Turissem en Lumnezia ex-

plicau ch'ils hosps da vacanzas apprezzieschien la cultura indigena e schazegien l'autentitad. Hosps che serendien per l'emprema ga en Surselva seigien pil solit beinformai, ha *Stephan Meyer* dau d'entellir. Biars possessurs da habitaziuns da vacanzas denton seigien buca ton cunscients dalla vasta purschida. Probabel vala quella explicaziun era per la populaziun indigena.

## Concentraziun da concerts ella dentersegiun

Empau deplorescha il commember dalla gestiun da Surselva Turissem la concentraziun da biaras purschidas culturalas indigenas ella dentersegiun nua che pauc hosps ein presents. El spera egl avegnir ina certa spustaziun da singulas presentaziuns. Sper ils events regulars ein entgins novums instradai sin la stad proxima egl intschess dallas vischnauncas da Surselva Turissem. A Valendau arva l'ustria «Gasthaus am Brunnen» sias portas. Igl architect *Gion A. Caminada* ha schaffiu ella vischinonza dalla renomada fontauna da Valendau in hotel pign cun ustria e sala. Al lag da far bogn a Davos Munts en Lumnezia vegn in ulteriur interessant edifeci aviarts. Ei setracta dil baghetg da menaschi creaus dils architectes indigens *Ramun Capaul* e *Gordian Blumenthal*. Per il curridders dalla distanza liunga ha in maraton naven da Glion entochen Tusaun liug ils 18 d'october. L'attractivitat da quella cuorsa sebase sil tschancun da cuorsa tras la Ruinalta. Aschia senumna il maraton era Transruinalta. Ils organisaturs vulan porscher a curridders e curridders in event da sport tras ina culissa natirala ch'els tituleschan sco

spectaculara. Alla natira dalla Ruinalta vul la Transruinalta demussar in cert respect. Per quei intent ei la participaziun agl emprem event da cuorer restrenschiu sin 300 curridders e curridders. La Transruinalta ei buca vegnida lantschada sco concurrenza alla Transviamala. Cumpletar la purschida da cuorer vulan ils organisaturs cun las duas cuorsas. La Transviamala ha liug in gi sunter la Transruinalta, schia ch'igl ei pusseivel da separticipar ad omisduas cuorsas sin ina distanza totala da passa 60 kilometers. La Transviamala ei gia vegnida honorada pliras ga sco la pli biala cuorsa da cuorer en Svizra.

## Simposi internaziunal

Ad in auter publicum sedrezza probabla-mein il simposi organisaus en connex cun las frescas dil meister da Vuorz. Divers referents sefatschantan cun la pictura digl artist nunenconuscent che ha luvrau el decuors dil 14avel tschentaner ella baselgia da Vuorz. Il simposi porta schizun la noziun «internaziunal» ed ha liug dils 3 entochen ils 5 d'october a Vuorz. Differents referents sefatschantan cun la pictura sco era cun la veta dil mintgagi dil temps nua ch'il meister da Vuorz ha luvrau e viviu. Denter auter s'exprima era igl autur *Iso Camartin* en causa. Sper la brochura che ha anflau la via ellas casadas presenta Surselva Turissem ils events da stad en sia preschientscha ella reit. *Stephan Meyer* ei perschadiu ch'ei basegna omisduas plattafuormas per contonscher la gliעד e far attent allas occurrenzas. La pli gronda sfida da Surselva Turissem, pertgei la purschida sezza ei gia avon maun en abundanza.